

ԵԳԻՊՏԱՀԱՅ ՀԱՄԱՅՆՔԸ 1970-1981 ԹՎԱԿԱՆՆԵՐԻՆ

ԽԱՉԱՏՏՐՅԱՆ Ա. Մ.

Ինչպես Եգիպտոսի ողջ պատմական ընթացքի, այնպես էլ եգիպտահայերի կյանքի ու գործունեության համար շրջադարձային փուլ էին Անվար ալ-Սադաթի նախագահության տարիները (1970-1981): Վերջինիս կողմից Եգիպտոսի պատմության ամենաարմատական փոփոխությունը Իսրայելի հետ միակողմանի (*արաբական աշխարհից դատ*) խաղաղության հասնելն էր, ինչն ամրապնդվեց Քեմփ-Դևիդի՝ 1978 թ. սեպտեմբերի 17-ի համաձայնագրով¹: Պատմագրության մեջ Իսրայելի հետ Եգիպտոսի համաձայնության գալու սկիզբն ընդունված է համարել 1977 թ. նոյեմբերի 19-ը, երբ Սադաթը կատարեց իր հայտնի այցելությունը Երուսաղեմ²: Այս այցելությամբ էլ սկսվեց արաբական աշխարհում Եգիպտոսի «մեկուսացման» շրջանը: Նա համոզված էր՝ մերձավորարևելյան հակամարտության կարգավորման խաղաքարտերի 99 տոկոսը ԱՄՆ-ի ձեռքին էր³: ԱՄՆ-ի հետ համագործակցելու Սադաթի պատրաստակամությունը ավելի ակնհայտ դարձավ 1973 թ. արաբաիսրայելյան չորրորդ պատերազմից հետո⁴, երբ արաբական աշխարհը և Իսրայելը հայտնվեցին աշխարհաքաղաքական, ռազմական, տնտեսական և բարոյահոգեբանական միանգամայն նոր իրավիճակում: Ակնհայտ դարձան արաբական երկրներում առկա սոցիալդասակարգային երկփեղկվածությունը և դրա հետեվանքով առաջացած բևեռացումը: Եգիպտոսի՝ արաբաիսրայելյան հակամարտությունից դուրս գալու պատրաստակամությունը պայմանավորված էր 1970-ականների կեսին եգիպտական հասարակության սոցիալ-քաղաքական կառուցվածքում տեղի ունեցող լուրջ փոփոխություններով⁵: Նախագահ Գամալ Աբդել Նասերի մահից հետո (1970 թ.) երկրի նոր ղեկավարությունը շրջադարձ կատարեց դեպի կապիտալիստական զարգացում, որի հետևանքով եգիպտական բուրժուազիան, որը ձգտում էր արևմտյան երկրների հետ բազմակողմանի հարաբերությունների հաստատմանը, վերականգնեց իր դիրքերը⁶:

¹ **Կարապետյան Ռ.**, Արաբական երկրների նոր և նորագույն պատմություն, Ե., 2003, էջ 220, "الاسبوع العربي" دسمبر 1977, "السفير" 25 نوفمبر 1977

² زيارة السادات لإسرائيل-وثائق وتعليقات إسرائيل. بيروت، 1978، ص 30.

³ **Князев А. Г.**, *Египет после Насера (1970-1981 гг.)*, М., 1986, с. 127.

⁴ **Մարաջյան Պ. Հ.**, 1973 թ. արաբա-իսրայելյան պատերազմը և արաբական առաջադիմական ուժերի դիրքորոշումը (Մերձավոր և Միջին Արևելքի երկրներ և ժողովուրդներ, հ, 9, Ե. 1978, էջ 305):

⁵ **Владимиров В. В.**, *Политика "открытых дверей" в Египте и местная буржуазия (Народы Азии и Африки, 1982, N 2, с. 25).*

⁶ **Князев А. Г.**, *Внутриполитическое и идеологическое развитие в посленасеровском Египте (Азия и Африка сегодня, 1984, N 4, с. 1).*

Եգիպտահայերի վերը նշված արտագաղթը քիչ թե շատ կանխվել է Սադաթի հռչակած «Բաց դռների» քաղաքականությամբ, որը հնարավորություն է տվել գործարար մարդկանց, այդ թվում՝ հայերին, ինչ-որ չափով կայունացնելու իրենց տնտեսական դրությունը: 1970-ականի սկզբին եգիպտահայերի ստույգ թիվը դժվար է նշել, ինչի մասին վկայում է առաջնորդական տեղապահ Ջավեն եպ. Չինչինյանը «Մեսաժե» թերթին տված իր հարցազրույցում՝ նշելով, որ այն մոտավորապես 15-20 հազար է⁷: Մեկ այլ տեղ նշվում է, որ 1974 թ. Եգիպտոսում հայերի թիվը 10 հազարից մի փոքր ավելի է⁸: Եգիպտոսի առաջնորդի հոգևոր հովանու ներքո էին գործում նաև Սուդանի և Եթովպիայի թեմերը: Համայնքային կյանքի «խավարումը» կանխելու համար մի շարք քայլեր էին ձեռնարկվում, ներառյալ՝ քաջալերվում էին համայնքի անդամների հաճախակի այցելությունները մայր հայրենիք, ինչպես նաև կոչ էր արվում հայ երիտասարդներին բարձրագույն ուսումը շարունակել Հայաստանի համալսարաններում: «Արև» թերթն ընդգծում էր մարզական միությունների կողմից սկաուտական և երիտասարդական խմբերով դեպի հայրենի գեղատեսիլ դաշտավայրերն ու լեռները արշավներ, ինչպես նաև եգիպտահայ հիմնադրամների միջոցով հանդեսներ ու փառատոներ կազմակերպելով՝ նոր սերնդի մեջ ազգային-հայրենասիրական զգացումները միշտ վառ պահելու անհրաժեշտությունը⁹: Հաջորդ քայլը համայնքի ղեկավարությունը տեսնում էր ծեր և միևնույն ժամանակ միայնակ մնացած ազգայիններին համոզելու մեջ՝ հետմահու ժառանգությունը կտակել ի նպաստ ազգային հաստատությունների, մշակութային օջախների և հայ մամուլի, որպեսզի հաղթահարվեր համայնքի նեղ կացությունը, ինչը կօգներ եգիպտահայ համայնքը փրկել քանակական անկումից: Մեկ այլ եգիպտահայ պարբերական՝ «Հուսաբերը» (դաշնակցության օրաթերթ), նույնպես մտահոգ լինելով հայերի շարունակական մեկնումներով, որը նշանակալի չափերով նվազեցնում էր եգիպտահայ գաղութի բնակչության քանակը, պարտավորեցնում էր յուրաքանչյուր եգիպտահայի՝ թեմական ընտրությունների ժամանակ նախապատվությունը տալ խառն ընտրական ցանկին, որպեսզի լիարժեք համագործակցության շնորհիվ գաղութը փրկվի վերահաս աղետից¹⁰: Համայնք-հայրենիք հարաբերությունների է՛լ ավելի բարելավմանն էր ուղղված 1972 թ. հունվարին Խորհրդային Հայաստանի կոմկուսի Կենտկոմի առաջին քարտուղար Ա. Քոչինյանի բարձրակարգ ընդունելությունը եգիպտահայ համայնքի կողմից: Նա Կահիրե էր ժամանել այլ նպատակով՝ մասնակցելու աֆրիկա-ասիական համաժողովին¹¹:

Պետության վերակազմակերպման գործում Սադաթն անմիջապես անցավ նոր օրենքների ստեղծմանն ու կիրառմանը: Դրանք վերաբերում էին ընդհանուր հաստատություններին և պետականացված ընկերություններին

⁷ Արև, 11.1.1971:

⁸ Հայ-սփյուռք հանրագիտարան, Ե., 2003, էջ 154: Այս շրջանի եգիպտահայ հա-մայնքի մասին գրականության բացակայության պատճառով հիմնականում օգտագործվել է եգիպտահայ պարբերական մամուլը:

⁹ Արև, 15.1.1971:

¹⁰ Հուսաբեր, 9VI.1971:

¹¹ Ջահակիր, 13.1.1972:

րին, վերջիններիս ծրագիր-կանոնագրին և պաշտոնավարողներին, կենսաթոշակներին, ինչպես նաև հանրապետության նախագահի, ազգային խորհուրդների, նախարարների խորհրդի և նախարարությունների, տեղական իշխանությունների գործառույթներին ու վերակազմակերպմանը¹²:

Սադաթի նախագահության հենց առաջին տարիներին եգիպտահայ ազգային իշխանությունները կարողացան հաջողություն արձանագրել՝ կապված ազգապատկան հողերը վերադարձնելու հետ, ինչը փաստում են Կահիրեի առաջնորդարանի հաղորդագրությունները: Առաջին հաղորդագրությունը կրում էր «Ազգապատկան հողերու հարցին բարուք լուծումը» խորագիրը. այնտեղ հիշատակվում է Հոդային բարեկարգության նախարարության հրատարակած՝ 1952 թ. թիվ 178 օրենքը, որի համաձայն՝ 1961 թ. առաջնորդարանին պատկանող երկրագործական հողերը ժամանակավոր գրավման էին ենթարկվել¹³: Այդ թվականից ի վեր ազգային իշխանությունները մեծ ջանքեր գործադրեցին, որի շնորհիվ ազգայնացումից զերծ մնացին ազգային բարերարներ Կարապետ Գալուստի և Գրիգոր Եղիայանի կտակած կալվածքները՝ ի նպաստ կրթական նպատակների: Մյուս հողերը շարունակում էին մնալ գրավման տակ: Այս իրավիճակում 1971 թ. փետրվարի 1-ին Հոդային բարեկարգության նախարարության Շիրպինի գրասենյակը վերջնական գրավման վճիռ է արձակել Հեսասի ազգապատկան 11 ֆեդդան հողամասի համար: Նկատի ունենալով, որ դրանով ազգային առաջնորդարանը զրկվում է տարեկան խոշոր եկամտից, Թեմական և Քաղաքական ժողովները սկսեցին գումարել բացառիկ համատեղ նիստեր, հղեցին դիմումներ պետական բարձրաստիճան պաշտոնյաներին և բարձրագույն մարմիններին, ինչի շնորհիվ՝ շուրջ մեկ ամիս գործադրած համառ գործողություններ իրականացնելով՝ հաջողվեց հետ ստանալ վերոհիշյալ հողամասը, և այս ամենը, անշուշտ, Եգիպտոսի իշխանությունների բարյացակամ վերաբերմունքի արդյունքն էր¹⁴: Մինչ այդ Հոդային բարեկարգության նախարարությունը խորհրդարանի վավերացմանը ներկայացնելու համար օրենքի նախագիծ էր պատրաստել, որով հայապատկան հողերի համար աննպաստ պայմաններ էին առաջադրվում: Սա ևս հանգեցրեց ազգային իշխանությունների կողմից խնդրագրեր և հուշագրեր հղելուն՝ ուղղված նախարարների, պետական բարձրաստիճան պաշտոնյաների, որոնց հետ տեղի էին ունենում նաև տեսակցություններ: Այս բոլոր աշխատանքները, բարեբախտաբար, պսակվեցին հաջողությամբ, և խորհրդարանի վավերացրած ու նախագահի ստորագրած՝ Հոդային բարեկարգության նախարարության 1971 թ. թիվ 35 օրենքը ընդմիջտ լուծեց եգիպտահայ համայնքի ազգային իշխանությունների՝ տարիների մղձավանջը դարձած հոդային հարցը, որի համար հայերը պարտական են այդ ժամանակվա կառավարությանը և նախագահ Անվար ալ-Սադաթին: Ի պատասխան եգիպտական իշխանությունների բարյացակամ վերաբերմունքի՝ համայնքի ազգային իշխանություններն ամեն կերպ սատարում էին Սադաթին ու երկրի կառավարու-

¹² Արև, 24.IX.1971:

¹³ Նույն տնդում, 21.VII.197:

¹⁴ Նույն տնդում, 19.IX.1971:

թյանը, ինչը փաստում են պաշտոնական հաղորդագրությունները: Իսլամական «Էլ Ատհա» տոնի առիթով Եգիպտոսի Արաբական Հանրապետության նախագահ Սադաթին գաղութի ուղարկած շնորհավորական հեռագրում ասված է¹⁵.

«Ն. Վ. Մոհամետ Անուար էլ Սատաթ

Նախագահ Եգիպտոսի Արաբ Միացեալ Հանրապետության

Գահիրե

Էլ Ատհայի տոնին առիթով, ի դիմաց Հայ Օրթոտոքս համայնքի հայրենասեր զաւակներուն և մեր ժողովներուն, ինչպէս նաեւ անձնապէս, կը ներկայացնենք ջերմ շնորհաւորութիւնները, աղօթելով Բարձրեալն Աստուծոյ, որ Ձեզ շնորհէ առողջութիւն և երկար կեանք, որպէսզի Ձեր գործակիցներուն հետ կարողանաք վերջնական յաղթանակը տանիլ և երկիրը առաջնորդել աւելի բարօր և բարգաւաճ վիճակի:

Ձաւէն եպս. Զինչինեան

Առաջնորդական Տեղապահ Հայոց Եգիպտոսի

Դիւան Գահիրէի Ազգային առաջնորդարանի»:

Եվ իզուր չէ, որ ազգային իշխանությունները 1976 թ. պաշտպանեցին Սադաթի վերընտրությունը, ինչն իր փաստաթղթային ձևակերպումը ստացավ նախագահին ուղղված հեռագրի մեջ¹⁶:

Եգիպտահայ համայնքի ղեկավարությունը գործադրում էր իր բոլոր ուժերը, որպեսզի այն պահեր «Էջմիածնական» ուղու վրա: 1972 թ. Կա-հիրեի թեմական մասնակի ընտրություններից հետո «Միացյալ ազգային ճակատի» (Հնչակ-Ռամկավար-չեզոք) թեկնածուները հաղթանակ տարան «Համերաշխասերների ճակատի (Դաշնակ-չեզոք) թեկնածուների նկատմամբ¹⁷: Այս մասնակի ընտրությանը վերաբերող հոդվածում «Ջահակիրը» գրում է. «Յստակ ըլլալու համար շեշտենք, որ սփիւռքի ամեն հայ համայնք իր եկեղեցիով՝ կապուած է Ս. Էջմիածինի և ազգային կապերով Մայր հայրենիքին: Այն բոլոր հայ համայնքները, որոնք կը փորձեն խզուիլ այս երկու նուիրականութիւններէն, անպայման կորստեան և անհետացման դատապարտուած կ'ըլլան»¹⁸:

1970-ական թթ. կեսին Եգիպտոսի մեջ հայերն իրականացրել են կրթական, մշակութային ու հասարակական ազատ գործունեություն: Այդ տարիներին եգիպտահայերը փորձում էին կապող օղակ դառնալ Հայաստանի և Եգիպտոսի միջև որոշակի հարաբերություններ ձևավորելու գործում: 1975 թ. Ալեքսանդրիայի ազգային իշխանությունների քաղաքական ժողովի ատենապետ Վահան Ալեքսանյանը իր բնակարանում ընդունելություն է կազմակերպել՝ ի պատիվ Խորհրդային Հայաստանի լուսավորության նախարար Սիմոն Հախումյանի, որին ներկա են գտնվել քաղաքի կառավարիչ Արդել Թավաբ Հոթայերը, Ալեքսանդրիայի կրթության փոխնախարար Ֆահմի Քաբրը, Ալեքսանդրիայում խորհրդային հյուպատոս Յուրի Մուսիլկովը, Կահիրեի կրթական նախարարության ար-

¹⁵ Ջահակիր, 18.I.1973:

¹⁶ Հուսաբեր, 16.IX.1976:

¹⁷ Նույն տնդում, 11.V.1972:

¹⁸ Ջահակիր, 4.V.1972:

տաքին հարաբերությունների տնօրեն Մահմուդ Ալին, եգիպտահայ համայնքի առաջնորդ Զավեն եպ. Չինչինյանը և այլ բարձրաստիճան այրեր¹⁹։ Ի պատասխան Վ. Ալեքսանյանի կողմից երկրի նախագահին ուղղված դրվատանքի խոսքերի՝ Ալեքսանդրիայի կառավարիչը իր ելույթում հայերին ներկայացրել է որպես Եգիպտոսի պատվավոր և աշխատասեր քաղաքացիներ։ 1970-ականը բեկումնային ժամանակաշրջան էր նաև եգիպտահայ համայնքի ներքին իշխանական օղակների համար։ 1973 թ. եգիպտահայ թեմը մնաց անգլուխ, քանի որ սրբազան Զ. Չինչինյանը որոշակի հանձնարարություններով մեկնեց ԱՄՆ²⁰։ Մինչև նոր առաջնորդի ընտրությունը առաջնորդական տեղապահությունը ստանձնեց Ներսեհ վրդ. Բապուճյանը։ 1977 թ. հունվարի առաջնորդական ընտրությանը դրված էր ինչպես տեղապահ Բապուճյանի, այնպես էլ Չինչինյանի թեկնածությունը, ինչը դժվարին կացության մեջ էր դրել եգիպտահայ համագումար ժողովին։ Խնդիրն այն էր, որ առաջնորդական ընտրություններից անմիջապես հետո հայր սուրբն անմիջապես դադարում էր տեղապահ լինելուց²¹, և քանի որ Չինչինյանը արտասահմանում էր, ընտրողների մի մասի կարծիքով, նա չպետք է սպասեր քաղաքական ժողովի կողմից ընտրության արդյունքների վավերացմանն ու անհապաղ պետք է վերադառնար Եգիպտոս։ Թեև Չինչինյանի թեկնածությունը պաշտպանում էր վեհափառ Վազգեն Ա-ն, եգիպտահայ համագումար ժողովի անդամների մի մասը՝ Պերճ Թերզյանի և Արթուր Պլքթանյանի գլխավորությամբ, գտնում էր, որ Զ. Չինչինյանն ընտրվելու դեպքում և կառավարության վա-վերացումից հետո կլինեի առաջնորդ, որն ընտրված էր, բայց արտասահ-մանում, և տեղապահ էր, որն այլևս պաշտոն չունեի։ Վերջապես այս բուռն բանակցությունների շնորհիվ ժողովի անդամները եկան եզրակացության, որ, այնուամենայնիվ, քվեարկությունը պետք է իրականացնել։ Սրբազանը ստացավ 30, իսկ հայր սուրբը՝ 15 քվե։ Ժողովականները ծափահարություններով ընդունեցին եգիպտահայ թեմի նոր առաջնորդ Զ. եպ. Չինչինյանի ընտրությունը²²։ Ինչ վերաբերում է առաջնորդական տեղապահ Ներսեհ վրդ. Բապուճյանին, որին թեմը ղեկավարելու 4 տարիների ընթացքում հաջողվեց եգիպտահայ համայնքի քաղաքական տարբեր հոսանքների միջև համերաշխություն հաստատել, նա հրաժարվեց մնալ եգիպտահայ թեմում և մեկնեց Ֆրանսիա։ Եգիպտահայերը մեծ հուզմունքով նրան հրաժեշտ տվեցին, ինչի մասին փաստում են նրա պատվին Ալեքսանդրիայի ազգային իշխանությունների կազմակերպած հրաժեշտի պատարագը և ողջերթի ընդունելությունը²³։

Եգիպտահայ ռամկավար, դաշնակցական և հնչակյան կուսակցական թևերին համայնքի այս դժվարին կացությունը ստիպեց բռնել համագործակցության ուղին։ Այս կուսակցությունների համապատասխան պաշտոնաթերթերի՝ «Արևի», «Հուսաբերի» և «Զահակի» միջև սկսվեց

¹⁹ Հուսաբեր, 13.III.1975:

²⁰ Արև, 1.II.1977:

²¹ Նույն տնդում, 31.I.1977:

²² Նույն տնդում, 2.II.1977:

²³ Նույն տնդում, 2.VII.1977:

համագործակցության և փոխըմբռնման գործընթաց, որը համակված էր համայնքին ծառայելու նվիրական պարտականության գիտակցությամբ՝ նկատի ունենալով ազգային ու համայնքային շահերը: Անտեսելով երբեմնի կուսակցական վեճերը՝ տարբեր միջոցառումներին կարելի էր տեսնել նախկին հակամարտ «ճակատների» ներկայացուցիչների՝ նստած իրար կողքի, որոնք միասնաբար խաղաղ գործակցության կոչ էին անում²⁴: Սրա վառ ապացույցը եղավ այն, որ 1979 թ. նոյեմբերի 11-ի՝ Կահիրեի թեմական մասնակի ընտրությունները տեղի ունեցան համագործակցական ցանկով²⁵:

1980 թ. Եգիպտոսի սահմանադրության մեջ կատարված փոփոխությունները եգիպտահայ համայնքի վարչական մարմիններին թույլ են տվել եգիպտական իշխանությունների իրավասության ոլորտից դուրս բերել լուսավորության և համայնական հոգերի հարցերը²⁶:

Եգիպտոսի հայ համայնքի պատմական այս շրջանն ավարտվեց 1981 թ. հոկտեմբերի 6-ին, երբ Կահիրեի արվարձանում ռազմական շքերթի ժամանակ «ալ-Ջիհադ ալ-Ջադիդ» ծայրահեղ իսլամական խմբավորման անդամները սպանեցին Եգիպտոսի նախագահ Մադաթին²⁷:

Սփյուռքահայ տեղաշարժը իր ցավագին հետևանքներով ազդել է Եգիպտոսի հայ համայնքի տնտեսական վիճակի, ազգային հաստատությունների և, բնական է, հոգեբանական դրության վրա՝ համայնքի առաջնորդներին և գործիչներին մտածելու տեղիք տալով: Այս մասին է փաստում սփյուռքահայության վերաբերյալ տարբեր հոդվածների և աշխատությունների հեղինակ Անդրանիկ Անդրեասյանը, որը Նասերի գլխավորած հեղափոխությունից մինչև 1970-ական թվականների վերջն ընկած 25 տարիների ընթացքում վեց անգամ այցելել էր Կահիրե, Հելիոպոլիս և Ալեքսանդրիա, այնտեղ ուներ գաղափարակից ընկերներ ու համախոհ բարեկամներ, որոնց հետ շրջում էր հայկական հաստատություններում, լինում առաջնորդարանում, դպրոցներում, ակումբներում և հանդիպումներ ու զրույցներ ունենալով տեղի հոգևոր հայրերի, ուսուցիչների, աշակերտների ու վարիչ պաշտոնյաների հետ՝ ծանոթ էր համայնքի հոգսերին և դրանց առնչվող ծրագրերին: Ներկա լինելով հրապարակային հանդեսներին և կազմակերպական ժողովներին՝ Անդրեասյանը գրում է. «Մինչ կը խօսեի բեմէն, նաեւ տխրօրէն կը չափէի պարապը թանկագին անձերու, որոնք խլուած էին մահէն, կամ մեկներ էին հեռաւոր ափերու խոստումներուն: Եւ ես հիմա անոնց կը հանդիպէի Պարիզի ու Լոնտոնի, Մոնթրէալի ու Թորանթոյի, Պոստոնի եւ Նիւ Եորքի, Տիթթոյի եւ Լոս Անճելըսի մէջ, խանդավառ ու հայրենասէր աղջիկներ ու տղաք, որոնք առաջնորդող դերեր կը կատարեն իրենց համայնքներուն վերապրումի պայքարին բոլոր ասպարեզներուն վրայ»²⁸:

²⁴ Պայքար, 6.1.1979:

²⁵ Արև, 7.XI.1979:

²⁶ Հայ-սփյուռք հանրագիտարան, էջ 154:

²⁷ Игнатенко А. А., *Халифы без халифата, М., 1988, с. 6.*

²⁸ Պայքար, 5.1.1979:

Կահիրեի և Ալեքսանդրիայի հայկական իշխանությունները և այնտեղի արվեստագետներն ու մտավորականները ամեն կերպ ջանում էին համայնքը պահել կենսական վիճակում և փրկել վերահաս աղետից: Ինչպես նշում է Ա. Անդրեասյանը, այդ ճիգերը համադրելու և դժվարին կացության համար ելք գտնելու գործում նշանակալի դեր էր կատարում «Արև» օրաթերթի խմբագրությունը: Գետնահարկի խմբագրատունը և վերնահարկի Գեղարվեստասիրաց սրահն ու հարակից բաժինները, ինչպես նաև Ալեքսանդրիայի նորակառույց ու գեղակերտ «Տիգրան Երկաթ» կենտրոնը շարունակում էին իրենց մշակութային գործունեությունը՝ մնալով մտավորական գրույցների, ժողովների և մշակութային ձեռնարկների կենտրոնավայրեր: Չնայած Եգիպտոսի իշխանությունների, մասնավորապես Սադատի հայանպաստ քաղաքականությանը՝ հայերը շարունակում էին արտագաղթել, ինչին խթանեց 1970-ական թթ. վերջին և 1980-ական թթ. սկզբին պետության ներքաղաքական իրավիճակի կտրուկ սրումը: Այդ ժամանակահատվածում երկրի ներսում տեղի են ունեցել ընդհարումներ մահմեդականների և ոչ մահմեդականների միջև²⁹: Հայերը պահպանել են չեզոքություն, սակայն նրանց արտահոսքը չի դադարել: Եթե 1950-ականին տեղի հայությունը շուրջ 45000 մարդ էր, ապա երեք տասնամյակ անց՝ 1980 թ., կազմում էր շուրջ 10000 հոգի³⁰: Չնայած դրան՝ Կահիրեի և Ալեքսանդրիայի հայ համայնքները շարունակում էին իրենց ճիգերը լարել համայնքի կենսականությունը պահպանելու համար:

АРМЯНСКАЯ ОБЩИНА ЕГИПТА В 1970-1981 ГОДАХ

ХАЧАТРЯН А. М.

Резюме

Годы президентства Садата (1970-1981) стали переломным этапом в развитии Египта и, в частности, для социально-культурного развития армянской общины. Проводимая президентом Садатом политика “открытых дверей”, предотвратив эмиграцию армян из Египта, способствовала стабилизации экономического положения армян. Однако обострение внутривнутриполитической ситуации в стране (столкновения между мусульманским и немусульманским населением) и напряженная внешнеполитическая обстановка спровоцировали волну эмиграций, в результате которых в 1980 г. численность населения египетской армянской колонии ощутимо сократилась, насчитывая всего лишь 10000 чел., в то время как в 1950-ых годах она составляла 45000 человек.

²⁹ Հայ-սփյուռք հանրագիտարան, էջ 154:

³⁰ Մելքոնյան Է. Լ., Հայկական բարեգործական ընդհանուր միության պատմություն, Ե., 2005, էջ 454: Մեկ այլ տեղ «Արև» օրաթերթի խմբագիր Ավետիս Յափուճյանը եգիպտահայերի թիվը 1979 թ. հաշվում է մոտ 8000 (Սովետական Հայաստան, 1979, N 1):